



KALAALLIT NUNAANNI KOMMUNIT KATTUFFIAT
DE GRØNLANDSKE KOMMUNERS LANDSFORENING

IMAQARNILIAQ

Aallartitat ataatsimiinnerat 2009
26. aamma 27. maaji Ilulissani

2009-mi aallartitat ataatsimiinneranni oqaluuserisassat

1. Tikilluaqqusineq
2. Aqutsisussamik toqqaaneq
3. Ullormut oqaluuserisassat akuerineqarnerat
4. Siulersuisut nalunaarutaat
5. Oqaluuserisassatut siunnersuutit
 - a) Kimik IT-ip taarsiissutaasa sumut atorneqarnissaat (Siulersuisut)
 - b) Nunaqarfimmiut peqatigiiffiannut KANUNUPE-mut attaveqarneq (Siulersuisut)
 - c) Kommunit tunitsivinnik piginnittunngorsinnaanerat (Kommuneqarfik Sermersooq, Atassut)
 - d) Pisortanit ikiorsiissutinik assigiissarinissaq (Kommuneqarfik Sermersooq, Atassut)
 - e) Siulersuisut katitigaanerat (Kommune Kujalleq)
6. Kattuffiup 2008-mut naatsorsuutai
7. Kattuffiup 2010-mut missingersuutai, aamma ilaasortat 2010-mi akiliutissaannik aalajangiineq
8. Tamalaat

Aallartitat

Kommune	Aallartitat najuuttut
Kommune Kujalleq	Thomas Ezekiasen (Atassut) - Kristine Raahauge-mut (Siumut) sinniisussaq Kîsta P. Isaksen (Siumut)
Kommuneqarfik Sermersooq	Per Nukaaraq Hansen (Kattusseqatigiit 1) Martha Abelsen (Siumut) Thiiooq Knudsen (Siumut) Emilie Kúnak (Inuit Ataqtigiit) Jens B. Frederiksen (Demokraatit)
Qeqqata Kommunia	Evelyn Frederiksen (Siumut) Katrine Larsen Lennert (Inuit Ataqtigiit)
Qaasuitsup Kommunia	Apollo Mathiassen (Siumut) Isak Hammond (Inuit Ataqtigiit) Karl Markussen (Atassut) - Knud Kristiansen-imut (Atassut) sinniisussaq
Siulersuisut	Enok Sandgreen (Siumut) (siulittaasoq) Søren Alaufesen (Atassut) (siulittaasup tullia siullemq) Ane Egede Mathæussen (Siumut) Bendt B. Kristiansen (Inuit Ataqtigiit)
	Najuutinngitsut Aqqaluaq B. Egede (Inuit Ataqtigiit), Kommune Kujalleq Godmand Rasmussen (Atassut), Qeqqata Kommunia Otto Jeremiassen (Siumut), Qaasuitsup Kommunia Ove Karl Berthelsen (Inuit Ataqtigiit), siulersuisut

Imm. 1: Tikilluaqqusineq

Aallartitat ataatsimiinneranni ullormut oqaluuserisassat aallartitsinnagit oqalugiartus-sanik pilersaarutip allannguutai siulittaasup **Enok Sandgreenip** tikilluaqqusinerminut atatillugu ilisimatitsissutigai.

Inatsisartunut qinersisoqalenera pissutigalugu Naalakkersuisut siulittaasuat pisarnertut oqalugiariartorsinnaangilaq. Tamatumunnga taarsiullugu Royal Greenland qinnuigine-qarsimavoq nunaqarfinni tunisassiorfeqarnermut tunngatillugu saqqummiussisussamik aggersitaqaqqullugu, ullormut oqaluuserisassat aalisartut piniartullu tunitsivissaqarnerannut tunngasunik ilaqarmata aallartitat oqallinnissaminni tunngavisseeqataasussamik. Taamalu direktionsassistent **Robert Møller** oqalugiaateqassaaq.

Aamma IT-mik aqutsisoqatigiit tamanna sioqqullugu killiffimmik nassuiaateqartussaa-galuarput – aammami IT-mik ineriartortitsineq ullormut oqaluuserisassanut ilaammat – tamannali pisinnaajunnaarpoq saqqummiussap aqutsisoqatigiit siulittaasuata akornu-tissaqalenera pissutigalugu.

Imm. 2: Aqutsisussamik toqqaaneq

Ole Dorph ataatsimiinnermik aqutsisussatut toqqaarpoq. Taassuma uppersarpaa aallartitat ataatsimiigiaqquneqarneranni malittarisassatigut piffissarititat, tamatumunnga ilaalluni ataatsimiinnermi atortussanik qaqugu nassiusereersimanissaq, eqqortinneqar-simasut.

Imm. 3: Ullormut oqaluuserisassat akuerineqarnerat

Ullormut oqaluuserisassat akuerineqarput.

Imm. 4: Siulersuisut nalunaarutaat

Siulittaasup **Enok Sandgreenip** siulersuisut nalunaarutaannik saqqummiussisutaa imaappoq:

Ukioq manna 2009 Kalaallit Nunaata naalakkersuinikkut allaffissornikkullu oqaluttu-arisaaanerani immikkut malugisarialinnik annertuunik marlussunnik pisoqarpoq pisoqar-tussaallunilu. Siulleq pereerpoq, tassa kommunit 18-iusimasut sisamarsuanngorlutik

januaarip aallaqqaataani kattunnerat. Aappaa qaammammi tulliuttumi pisussaavoq, tassa Kalaallit Nunaata Danmarkip naalagaaffiata iluani namminersulernissaa.

Taamaattumik siulersuisut nalunaarutaannik qaammatip ataatsip matuma siorna allak-katigut nassiussuunneqarsimasumik saqqummiussissutissap matuma piareersarnerani pissusissamisoorsimavoq oqaluttuarisaanermi kingumut qivialaarnissaq – ukiunik arfiniliinnannuanilluunniit.

2003-mi septembarimi borgmesterit kommunaldirektørillu Qaqortumi ataatsimiinnerata naammassilernerani taamani KANUKOKA-mi siulittaasusup Jens Lars Fleischerip ataatsimiittut tunuliaqutaralugit naalakkersuisut siulittaasuannut saaffiginnissuteqarluni allagaa KANUKOKA-p nittartagaatigut saqqummiunneqarsimasoq atuarlugu qungu-junnarsinnaasunik eqqarsariaallannartoqarpoq.

Ima allassimasoqarpoq: (issuaaneq aallartippoq) ”...*Pilersaarut malillugu borgmesterit tulleriiarluq saqqummiussipput namminneq kommuneqarfimminninngaanniit isigalugu kommunit aaqqissuussaanerisa nalilersoqqinnissaannik pilersaaruteqarnermut isummaminnik. Tassani paasivarpur isummat assigiinneqisut. Ataasiakkaat kommunit kattunneqarsinnaanissaannut isumaqataaangillat allaffeqarfikkulli suleqatigiissinnaan-ernut akuersaarluq. Ilaatigut kommunit kattussinnaanissaat aqutissiuuteqquneqarpoq. Amerlanerilli tungaanniit erseqqissarneqarpoq pinngitsaaliissummik kommunit kat-tutsinniarneqarsinnaanissaat akuersarneqanngitsoq. Ataatsimiittulli tamarmik isumaqatigiissutigat suleqatigiinnissamik oqallinnerit naammalermata piviusunngor-titsinissamut sinaakkutassat, tassalu inatsisitigut allannguutissat, piaartumik naalakkersuisunit suliarineqarnissaat kissaatigineqassasoq.*” (issuaaneq naavoq).

Taavalu allakkami kissaatigineqarpoq kommunit aamma Namminersornerullutik Oqar-tussat aaqqissuussaanerannik nalilersueqqittussamik ataatsimiittaliortoqassasoq. Saaf-figinnissullu ima naggaserneqarpoq: (issuaaneq aallartippoq) ”*Suliassat ingerlanneqar-neranni allaffissornerujussuup annikillisarneqarnissaa anguniagassanut ilaamat kis-saatigaarput qarasaasiatigut atortoqarnerup ullutsinnut naleqquttumik suleqatigiiffiul-ernissaa ilanngullugu sammineqassasoq.*” (issuaaneq naavoq)

Naluneqanngitsutut ataatsimiittaliaq pilersinneqartussatut kaammattuutigineqartoq 2004-imi januaarimi sulilerpoq, 2005-imi ukiakkut isumaliutissiissummik saqqum-miussilluni tamatuma kingorna oqallinnerup ingerlaqqinnerani, isummanik ilusilersueq-qinnermi, kommunit kattuttussat ”imminnut nassaariniarneranni” inaarutaasumillu inat-sisiliornerni tunngavigineqartumik.

Namminersorneq pillugu isumalioqatigiissitap siulliup – tassa nunatsinneersuinnarnik ilaasortaartup – assortuussutaarujussuanngitsumik ungaqqukkuminaatsumillu siunner-suutigereersimavaa allaffissornerup kommuneqarnerullu nutaamik aaqqissuunneqarnis-saat.

Taamaattumik kommunit aallaqqaammulli aalajangersimapput aaqqissuussaanermik iluarsaaqqinnissaq kattuffitsik aqutugalugu suleqataaffiginiarlugu taamaaliornermik-kulli sunniuteqarfiginiarlugu – soorlumi tamanna 2003-mi borgmesterit kommunaldi-

rektørillu Qaqortumi ataatsimiinnerannit oqaaseqaatip aatsaannguaq issuakkama erser-sikkaa.

Aamma taamani ukiut arfinilinnngulersut matuma siornatigut oqaaseqaammi oqaatigine-qarpoq ”suleqatigiinnissamik oqallinnerit naammalersut” – ima paasinagu suleqatigiin-nissaq oqallisigineqaqqittariaqanngitsoq, imali paasillugu nunap immikkoortuini illo-qarfiit nunaqarfiillu eqqaamioriit suleqatigiinnerusariaqarnerannik ukiorpassuanngor-tuni oqallisaasoq timitalerneqartariaqalersoq.

Oqarputtaaq ”qarasaasiatigut atortoqarnerup ullutsinnut naleqquttumik suleqatigiiffiul-ernissaa” sulissutigineqassasoq.

Ullumi periarfissaqalersimavugut suleqatigiinnissap oqaasiinnaajunnaarluni timitaler-nissaanut. Utoqqatsissutissaarussimavugut suleqatigiinnnginnissatsinnut – inatsisiti-goortumik ”katinnerup” kingunerisaanik pinngitsoorata suleqatigiittussaavugut.

Kommunit kattuffiata siulersuisuisa iluarusuutigalugu maluginiarpaat maanna aaqqis-suusnaanerup nutaap aallartinnerani kommunit nutaaliornissaminut nukissaqarpassissut iluatsittumillu ineriartortoqartariaqarnera aalajangiusimagaat.

Ataatsimut isigalugu assiliaq kusanarpoq isumalluarnarlunilu. Soorunami aatsaat aallar-tikkatta – tassa kattunnermit qaammatit tallimannngimmataluunniit – suut tamarmik suni tamani iluarsereersimanissaat naatsorsuutigineqarsinnaanngilaq, taama isumaqas-sagutta immitsinnut salloqittassaagut. Pingaerneruvoq kommunit kattunnerata siunertai naapertorlugit siuariartuutaasunik iliuseqarniartuarnissaq. Maluginiarpullumi innut-taasunik kiffartuussinermi assigiissaarinissaq pitsanngorsaannissarlu tamani pingaartin-neqartut. Tassa taamaassaaq, tamatumani kaamisaaqataarusuppugut.

KANUKOKA tamatumunnga tunngatillugu piareersimarusuppoq siunnersuinikkut suugaluartutigulluunniit ikiortiserineqarnissaminut, soorlu pisussaaffinnik piginnaati-taaffinnillu agguataarinissamut pilersaarusiornerni – aamma suliaasaqarfiit kommunit Namminersornerullutik Oqartussanit tiguajumaagassaat eqqarsaatigalugit.

Taamatuttaaq kattuffik peqataarusuppoq pikkorissaanerit kommunit ataasiakkaat nam-minneq ingerlataasa aamma kommunit allat sulisuinit peqataaffigineqaqqullugit neqero-ortutigineqarsinnaasut imarisaasigut aaqqissuunneranni.

Aamma eqqaasariaqarpoq kommunit qitiusumit immikkut aningaasatigut ikiorneqan-ngikkaluarlutik kattunnermut alloriarnerat ajunngitsumik pisimammat. Tassami isu-maqartoqartoqarniaqinani nunami taama isorartutigisumi kommunit 18-it ukiut 50-it ingerlaneranni allaffissornikkut ingerlatsinikkullu ”immikkut kultureqaleriartuaarsima-sut” kattutissallugit pisariitsuarsuullunilu ajornanngitsuarsuussasoq – naaggali!

Borgmesterit kommunaldirektørillu oqarissaarumatoorsuunnginnamik kattunnerup ki-ngorna qaammatini siullerni ilisimatittarpaatigut politikkikkut allaffissornikkullu suli-neq ”ajoriinnagassaanngitsumik” ingerlalersimasoq. Taava paasiinnartarparput pissutsit ataatsimut isigalugit toqqissisimanartumik aallariartoqartoq.

Tassami maanna siusippallaarpoq aaqqissuussaannermik iluarsaaqqinnikkut aningaasatigut pitsanngorsaataasunik oqilisaataasunillu takussutissiorniassalluni. Aaqqissuussaannermik iluarsaaqqinnissamut isumaliutissiisummi siulittuutigineqareerpoq aaqqissuussaannermut nutaamut ikaarsaannermi ukiuni siullerni aningaasartuutit amerligalarumaartut. Tamannalumi aamma kommunini nutaani maannakkorpiaq misigineqangaatsiarpoq, pingaartumik Avannaani Kujataanilu aningaasanik tigorianaannarnik amikkittoqqajaasarnikkut.

Naluneqanngitsutuulli “pisortat suliassa qarfiisa aaqqissuussaannerannik iluarsaaqqinneq” tassaaginngilaq kommunit kattunnerat ukiup matuma aallartinnerani pisoq. Aammali tassaavoq Namminersornerullutik Oqartussat ingerlatsinikkut suliassa qarfiinik kommuninut nuussinissaq. Tamanna suli pinngilaq, tunngaviusunullu ilaalluinnarluni kommunit aaqqissuussaannermik iluarsaaqqinnissamut suleqataaniarlutik aalajang-ersimanerannut.

Kommunimmi kattupput suliassa qarfinnik kommuninit ingerlanneqarnissaminut tuluarnerusunik Namminersornerullutik Oqartussanit tigusinissaminut aningaasatigut tunngavissarissaarnerulerniassagamik nukittunerulerniassagamillu – taamalu aamma innuttaasunik sullissinermi pitsanngorsaaniissamut periarfissarissaarnerulerniassagamik. Taamaassappallu soorunami isumagisariaqarpoq suliassa qarfinnik nuussinermi suliassa qarfiit aningaasartaasa pisariaqartitsinermut naapertuuttumik malinnaatinneqarnissaat.

Taanna pingaartillugu taavara maluginiaratsigu soorlu atuarfinnik sanaartorneq illutaannillu iluarsaassineq maanna Namminersornerullutik Oqartussat oqartussaaffigisaat Inatsisartut aningaasaliiffiginikippallaartaleraat, ilaatigut aningaasat suliassat affaannaannut naammattarlutik.

Atuarfiit illutaannik sanaartorneq iluarsaassinerlu tigujumasanut siullernut ilaanngikkaluarpup, tamannali assersuutissaatipparput kommunit tigusassaasa qaammatini aggersuni piareersarneqarnissaanni isumaqatigiinniutigineqarnissaannilu aningaasartaannik malinnaatitsinissap qanoq pingaaruteqartigineranut.

Siulersuisut allakkatigut nalunaarutaanni qaammatip ataatsip matuma siorna aallartitanut kommuninullu nassiussuunneqartumi qupp. 10-mi takussutissiivugut suliassa qarfinnik tigusinissamik suliniutit piareersaatillu sumut killinnerannik aammalu kattuffiup siulersuisuisa borgmesterillu peqatigiillutik qanoq pingaarnersuisimanerannik.

Ullormik tigusiffissamik taasaqarfigalugit qaammatini qaangiuttuni piareersarneqarsimasut tassaapput: 1) Meeqqanut inuusuttuaqqanullu ulloq unnuarlu paaqqinnittarfiit, 2) Innarluutilinnik isumaginnineq, 3) Imerajuttunik katsorsaaneq, 4) PPR (pædagogisk-psykologiskimik siunnersuisoqarneq) aamma 5) Annertusisamik immikkut ittumik atuartitsineq. Suliassa qarfiit taakku tamaasa 2010-mi januaarip aallaqqaataaniit kommuninit tiguneqarnissaat siunniunneqaraluarpoq.

Taavali nalunngilarput Inatsisartunut qinersisoqartussanngortoq. Taamaattumik inatsisiliorneq uninngagallarpoq. Maajillu qiteqqunnerani Namminersornerullutik Oqartussani

atorfillit tungaannit ilisimatinneqarpugut **meeqqanik inuusuttuaqqanillu ulloq unnuarlu paaqqinnittarfiit aamma innarluutilinnik ulloq unnuarlu paaqqinnittarfiit** 2010-mi januaarip aallaqqataani tiguneqarsinnaanaviannngitsut pissusissaq malillugu inatsisiliornissamut piffissakippallaalermat – aammami allannguutit pingaaruteqartut sulisunut nalunaarutigineqartussaammata minnerpaamik ukiup affaanik sioqqullugu.

Suliassaqarfiilli allat, tassa **annertuumik innarluutilinnik isumaginninneq, PPR, annertusisamik immikkut atuartitsineq aamma imerajuttunik katsorsaaneq** januaarip aallaqqaataani 2010-mi tiguneqarsinnaassapput kommunit piumappata naalakkersuisunillu nutaanik pilersitsinissap kingornatigut suliassaqarfiit taakkua aningaasartaannut tunngasut isumaqatigiissutigineqarsinnaassappata.

Allakkatigut nalunaarummi aamma ilimasaarivugut suliassaqarfiit isumaginninnermut tunngassuteqartut aatsaat taasakka pillugit suleqatigiissitat arlariiusut aallartitat ataatsimiinnissaat sioqqutitsiarlugu siulersuisunut inassutissaminnik saqqummiiumaartut. Ippassarlu taama pisoqarpoq.

Suleqatigiissitat taakku marluusut paasissutissanik amigaatigineqartunik katersuisusaasimapput aammalu inassuteqaasioqquneqarlutik Meeqqaanik inuusuttuaqqanillu ulloq unnuarlu paaqqinnittarfiit aamma Innarluutilinnik ulloq unnuarlu paaqqinnittarfiit kiisalu annertuumik innarluutilinnik isumaginninnerup 1. januaari 2010-miit kommuninut tunniunneqarnissaannik.

Suleqatigiissitat suliarfik aallartippaat novembarimi 2008-mi, siunniullugu 2009-mi maajip qiteqqunnerani naammaassinissartik tamatumalu kingorna kommuninut tusarniaanissartik.

Suleqatigiissitat inassutigaat meeqqanik inuusuttuaqqanillu ulloq unnuarlu paaqqinnittarfiit, innarluutilinnik ulloq unnuarlu paaqqinnittarfiit aamma børnehjemit kommunit ingerlataat Kommunit Qitiusumik Ingerlatsiviannit 1. januaari 2010-miit ingerlanneqalissasut, ukiunik marlunniit sisamanut ikaarsaariarfeqartumik.

Aammattaaq suleqatigiissitat arlariillutik inassutigaat Kalaallit Nunaanni Danmarkimilu annertuumik innarluutilinnik isumaginninnerup ingerlanneqarnera tamarmi 1. januaari 2010-miit kommuninut tunniunneqassasoq.

Suliassaqarfinnik allanik tigusinissami qanoq pingaarnersiuinissamik siulersuisut tungaviusutigut isumaat siulersuisut nalunaarutaanni immikkoortumi “Suliassaqarfinnik tigusinissaq”-mik qulequtalimmi qupp. 9-miit allaaserineqarput.

Siulersuisut nalunaarutaanni isumaginninnermut tunngasunut immikkoortumi ilaatigut taaneqarpoq ilaqutariit meerartallit ikiorserneqartarnerat pillugu isumasioqatigiinneq, KANUKOKA-mi siulersuisut borgmesterillu inassuteqarneratigut ukioq manna februaarip naanerani ingerlanneqartoq. Isumasioqatigiinnermi saqqummiussat inerniliinerillu eqikkarlugit nalunaarussiaq matumuuna innersuussutiginnarsinnaavara, kaammattuutugalugu misilittakkat, kissaatigisat inassuteqaatillu tassani allaaserineqartut kommunit

aamma Namminersornerullutik Oqartussat isumaginninnikkut ingerlatsineranni aalajangiisarnerannilu iluaqutissatut atorneqassasut.

Nalunaarusiami taaneqartut ilaatigut marluk maluginiarpakka. Siullermik, pisortat suliffeqarfiutaasa assigiinngitsut – tassa meeqqat angajoqqaallu isumannartut eqqumaffigiluarneqarsinnaaqqullugit piaartumillu ikiorserneqartarsinnaaqqullugit isumaginnittoqarfiup, atuarfeqarfiup, peqqinnissaqarfiup meeqperiviillu – *pisussaaffiliisumik* suleqatigiilernissaannik kissaatigisaq.

Aappasaanik, nalunaarusiami allassimavoq maluginiarneqarsimasoq meeqqanik kaatsisisoqartarnera tassatuaanngitsaq pissaaleqisut ajornartorsiutaat, aammali ilaqutariinni akissaqarnerusuni atuuttoq. Taamaattumik ilaqutariinni pingaartitassat angajoqqaatullu akisussaaffiup innuttaasunut oqallisigitinneqarnissaannut isummerfigitinneqarnissaannullu sumiiffinni politikerit siuttuusariaqartut oqaatigineqarpoq. Siunnersuut tusaanigaassaqqivippoq.

Isumaginninnermut tunngasut nangillugit naggasiillunga eqqartulaarusuppara qaammatit qaangiuttut ingerlaneranni peqatigiiffinnik pingasunik ataatsimeeqateqartarsimanera taakkua ataatsimeeqatiserinninneri tunngavigalugit, taakkulu tamaasa neriorsortarsimalugit oqariartuutaat suliniutaallu isumaqatiginartut kommuninut sapinngisamik tapersersortaqqullugit kaammattuutigiumallugit.

Kinguaassiuutitigut atonerlugaasimasunut annertoqqusersuisut suleqatigiiffiannut “Tasiorta”-mut “ambassadøritut” folketingimullu ilaasortaqaq Juliane Henningsen toqqarneqarpoq tapersersortissarsiarineqarluta.

Meeqqanik kinguaassiuutitigut atonerluisarneq ajornartorsiutaavoq alianartuq inuppassuarnullu sunniuteqapiluttartoq, allaat aarlerigisamit annerusumik. Suleqatigiiffiup iliuusissatut siunnersuutigisartagai assigiinngitsutigit aalajangiiniartarnerni tusaaniaq-qunarput. Kinguaassiuutitigut atonerluisarnerup imaluunniit atonerlunneqarsimasut iliuuseqarfigineqarnerunissaat kommuninut kaammattuutigerusunnarpoq. Atonerlunneqarsimasut atonerluisimasullu katsorsartarfigisinnaasaannik pilersitsiniartoqarnissaa, tamannalu pitinnagu atonerlunneqarsimasut ataatsimoorfigisinnaasaannik ornittakkanik periarfissiisinaanissaq, kommuninut eqqummaariffigeqqunarpoq.

Innarluutillit Kattuffiat aamma ataatsimeeqatigaara. Kattuffiup kommunit innarluutilinik isumaginninnermi erseqqissunik politikkeqarnissaat kissaatiginartippaa. Innarluutillit immikkut ittumik suliffeqartitaanermi nal. akunneranut 15 kr.-isiaqartitaanerat sullugalugu iluarsisariaqartutut tikkuarpaat, aammalu illuliortiternermi, majuartarfiliortarnermi elevatoriliisarnermilu innarluutillit eqqarsaatigineqartarnissaat kaammattuutigalugu.

Innarluutillit pisiniarfinnut suliffeqarfinnullu allanut ajornanngitsumik isersinnaanissaata sanaartormermik akuersissummik tunniussinnermi piumasaqaataasarnissaa eqqumaffigineqassasoq kaammattuutigerusunnarpoq. Naak tamanna inatsimmi qulakkeer-

niarneqaraluartoq amerlanertigut takusinnaavarput sanaartukkani piumasagaat tamanna amerlanertigut malinneqarneq ajortoq.

Innarluutillit Kattuffiata ataatsimeeqatiginerani KANUKOKA tunngavissaqartumik tusangiasaarneqanngitsuunngilaq, tassa kattuffiup allattoqarfiata isaariaa innarluutilinnut ajornaallisagaanngimmat. Tamanna ukioq manna iliuuseqarfiginiarparput.

Napparsimasut ilaqutaasa peqatigiiffiat NNN ataatsimeeqatigigakku siunnersuutigisaat aamma ingerlateqqitassaqqissorujussuuvoq tunngavilersorluagaagami.

Tassa soorlu aapparisaq perululluni Danmarkimi napparsimmavimmi uninngatillugu ornikkaanni hotelimi unnuisariaqartarneq amerlasuut misigereersimavaat. Tamanna aki-soorujussuusarpoq, tamatumani lu aamma kommunit aningaasartuuteqangaatsiartartut naluneqanngilaq.

Peqatigiiffik siunnersuivoq illumik pensionat-imik pilersitsisoqassasoq Danmarkimut katsorsartikkiartortut qanigisaasa inisimaffigisartagassaannik, tamanna tamanut akikin-nerusussamik aqqinneqarsinnaammat, aammalu siunnersuisarnikkut ingerlatsivittalerlugu aqqiissuteqarfigisinnaagaanni iluassaqimmat. Tamanna kommunini politikerinut maanna katsorsimasunut matumuuna ingerlateqqippara.

Taamaalillunga siulersuisut nalunaarutaat saqqummiuppara tapiliussanik oqaaseqarfigiitigalugu. Neriuppunga ualimut [eqimattani] oqallilluarumaartusi – oqaaseqatigiumaakkasi aqagumut qilanaarutigissavavut.

Eqimattat siulersuisut nalunaarutaat pillugu oqaaseqaataat

Kîsta P. Isaksen, Kommune Kujalleq:

Nalunaarutini naqitami oqaasiinnakkullu nalunaarummi eqqartorneqartunut tunngatillugu immikkut oqaaseqaatigiumasat:

1) Suliassaqarfinnik tigusinissaq: Namminersornerullutik Oqartussaninngaanniit kommunerujussuarnut suliassaqarfiit nuunneqartussat manna tikillugu isummiunneqarsimasut aammalu inatsisiliornikkut angumerineqarsinnaasut, tassaasut Imerajuttunik katsorsaaneq, PPR aamma Annertusisamik immikkut ittumik atuartsineq saniatigut allat nuutassatut eqqarsaatersuutigineqartut pillugit Kommune Kujallermiit inassutigaarput isumasioqatigiinneqartariaqartoq suliassaqarfiit sorliit pingaarnersiorlugillu tulleriarneqarnissaat anguniarlugu.

Imerajuttunut katsorsaannermut tunngatillugu oqaatigineqassaaq Kommune Kujalliup nammineq aalajangerusummagu katsorsaariaaseq qanoq ittoq ingerlatissanerlugu.

Kommune Kujalliup pingaaruteqarluinnartutut oqaatigissaavaa nuutassamut suugaluartumulluunniit tunngatillugu aningaasat ingerlatsinermi matusissutaasussat tamakkiisut malinnaatinneqassasut.

2) IT-mi suliniutit: Pissangalluta utaqqisimagaluarpaput IT-mik aqutsisoqatigiit killiffimmik nassuiaataat ippassaq ataatsimeersuarnerup aallartinnerani saqqummiunneqartussaagaluarluni saqqummiunneqangitsoortoq, Kommune Kujallermillu sakkussaq pineqartoq kommunerujussuannngortitsinermi sakkutut pingaaruteqarluinnartutut isigigat-sigu.

Assersuutitut oqaatigilarput ajoraluartumik suli aningaasarsialerineranut systemi tamakkiisumik atuutinnngimmat, taamaattumillu kommunini ingerlatsineranut aningaasartuutaasartut annertunerpaartaat sukumiisumik suli malinnaavigisinnaanngilavut.

3) Akileraarutit aamma akiliisitsiniartarneq: Pilersaarut sukumiisooq IT-mik aallaavilik sunillu imaqtartinniarneqarnersoq, sumut killinnersooq, paasiteqquvugut.

Siulittaasup oqaluinnarluni nalunaarutitut ilanngutaani quppernerit pingajuanni oqaaseqatigiit imatut oqaasertalerneqarput: Issuaalaarlanga: ”Tamannalumi aamma kommunini nutaani maannakkorpiaq misigineqangaatsiarpoq, pingaartumik Avannaani Kujataanilu aningaasanik tigoriaannarnik amikkittoqqajaasarnikkut.” Kommune Kujalliup KANUKOKA-mut suliassiissutigissavaa sulisitsisut allat assigalugit kommunit akileraarutitut akiliutigisartagaasa qaammatip ulluisa 20-anni akilernerqartussap Namminersornerullutik Oqartussaniit akileraarutitut tunngatillugu akiliutaagallartartut ullormi pineqartumi kommunit karsiinut nakkartussanngorlugit aamma aaqqinneqarnissaat, taamak iliornikkut kommunit pisariaqanngitsumik erniatigut nammakkersorneqartarnerat pisariaarutissagaluarpat. Ilemi teknikkiinnaavoq.

Akiliisitsiniartarnermut tunngatillugu nuannaarutigaarput ajornartorsiutinik qaangii-sariaqarneq siunertaralugu suliniuteqartuartaqarneq pingaartinneqarmat, kisianni naammaginngilluinnarparput siulersuisut nalunaarutaattut ‘taamaaliornikkut regionschefit marluk akiliisitsiniarnermi sulianik oqimaannerusunik taamaallaat sammisaqartinneqalissasut’. Kommune Kujalliup pingaartilluinnarpaa pisortat suliffeqarfiisa akornanni paasissutissanik tunniusseqatigiissinnaaneq aporfeqannginnerulluni killilersugaananilu pisinnaasariaqartoq. Aporfilersuinerit killilersuinerillu kingunerisaannik kommunit ataasiakkaat iternga tikillugu kikkut qanorlu annertutigisunik – soorlu akileraarutitut – akiitsoqarnersut malinnaaffigisinnaanngilaat.

4) Nunaqarfiit: Oqaluttuarisaanermi alloriartoqarpoq ilaatigut nunaqarfiit marluinnaanngitsut pingasuusartulli ataatsimoortumik aqutsisoqalersinneqarnerisigut. Taamatut iliorneq siunissami annertunerujartuinnartumik suleqatigiinnissamut aqutaasariaqartoq Kommune Kujalleq aamma isumaqarpoq.

Nunaqarfiit ineriartorteqqinneqarnissaat oqallisaajuarmat piumasaraarput inatsisitigut sinaakkutissat soorlu kommunit inuussutissarsiornermut kalluusimasinnaanerannut inatsimmi aporfiusut aamma KANUKOKA-p qaangerniarlugit suleqataaffigisariaqarai.

5) Isumaginninneq peqqinnissarlu: Isumaginninnermut tunngatillugu Kommune Kujalliup KANUKOKA-p siulersuisuinit suliassiissutigaa ukioq “Ilaqtariit meerartallit ikiorserneqartarnerat” pillugu isumasioqatigiinnermi eqikkaanerit Inatsisartunngortus-sanut naalakkersuisunngortussanullu aaqqiisuteqarnissaq siunertaralugu isumaqatigiinniutigissagai.

Meeqqanut tapiissutit qaammatikkuutaarlugit tunniunneqartarnissaat allanngortinniarneqartoq Kommune Kujalliup isumaqatiginngilaa, aalajangiusimaqqullugulu ullumikkut qaammatit pingasukkaarlugit tunniussisarnerup ingerlaannarnissaa, taamatut aningaasat tunniunneqartartut pisiassanut naleqarnerusunut atorneqarsinnaasarnerat ilualugu.

Peqqinnissaqarfik eqqarsaatigalugu KANUKOKA-p qulakkeersimatinniartariaqarpaa sullissinerup pitsaanerpaajuaannarnissaa, aamma pitsaaliuinermi pinaveersaartitsineq aqputigalugu suliniutit pingaartinnerisigut.

Siulittaasup oqaluinnarluni nalunaarummini Danmarkimi illumik pensionat-imik pileritsisoqarnissaanik katsorsartikkiartortunut qanigisaasut inisimaffigisartagassaannik maani katersersorsimasunut ingerlatitsinera eqqarsaatigalugu Kommune Kujalleq anertuumik tapersersuivoq, ilaatigut siorna siulersuisunut oqaluuserisassanngorlugi ingerlatsisoqarnikummat, tassani periarfissatut misissoqqullugu kommunit kattuttussat aammalu Namminersorerullutik Oqartussat suleqatigiinermikkut pitsaanerusunik atugassaartitsilernissaat.

6) Atuartitaaneq: Attaveqaatit aqputigalugit sumiiffinni inukitsuni soorlu nunaqarfinni allanilu najugaqarfinni atuartitaanerup piviusunngortittariaqalernera Kommune Kujalliup erinitsaappaa!

Atuartitaanerup iluani atuartitsissutigineqartariaqartut atuakkat kopeeriinikkut amerlasuunngortiinnarnagit atuaganngorlugit pigineqarsinnaalertariaqarput, ilaatigut ilinniartitsisut peqatigiiffiannik IMAK-imik isumaqatigininniartarnernut ilanngullugit.

Atuarfiit orniginartut piginissaat Kommune Kujalliup pingaartilluinnarpaa, taamaatumik nutarteriuarnissaq aserfallatsaaliuarternerlu isumagineqartariaqarput.

7) Akissarsiat sulisoqarnerlu: Ataatsimoortumik isigalugu Kommune Kujalliup pingaartippaa kommunit angissusiat apequtaatinnagu akissaatit assigiinnissaat, taamaatumik siulersuisut nalunaarutaanni qupperneq 23-imi allassimasut imaattut issuassavavut: ”Anguniarneqassaaq atorfeqartitsinermi atugassarititaasutigut tamanut atuuttutigut Namminersorerullutik Oqartussani imaluunnit kommunini atorfeqaraanni assigiimmik tunngavissaqartitsisoqarnissaa, aammalu akissarsiat nikingassutaat taamaallaat akissusaaffiit suliallu imarisaasa assigiinngissutaannut takussutissaassasut.”

8) Teknikkeqarneq avatangiisillu: Saviminernik eqqagassanik katersiniarneq sooruna unittuuissaq?

Eqqagassanik ikuallanneqarsinnaasunik ikuallaavilinnut assartuisinnaaneq misileragasatut oqaluttuariinnarnagu piviusunngortittariaqarpoq, nunatta karsia aamma aqputigalugu qulakkiikkamik.

Nunaqarfinni ikuallaaveeqqat ukiorpassuasinni pigineqareersut akuerisaasumik ingerlasariaqarnerat qulakkeertariaqarpoq nunatta eqqiluutsuutinnissaa peqqinnissattalu illersorneqartariaqarnera pingaartikkatsigit.

Siuliani immikkut oqariartuutigisatta saniatigut siulersuisut nalunaarutaat sukumiisut akuerivavut.

Emilie Kúnak, Kommuneqarfik Sermersooq:

Siulersuisut nalunaarutaannut oqaaseqaatit:

- Suliassanut tallimanut akisussaaffimmik tigusinissamut - pingaaruteqarluinnarpoq aningaasanut tunngatillugu qulaajaasoqarnissaa aningaasartaasaalu ilanngunneqarnissaat piomasqaataassaaq - tassani pingaaruteqarmat kommunit siulliullutik iliuuseqarnissaat Namminersornerullutik Oqartussat utaqqiinnanngikkaluarlugit.
- Akileraartarnermut tunngatillugu - kommunit Aqutisoqarfirmut atassuteqartuarnerata saniatigut pingaaruteqarpoq KANUKOKA-miit malinnaaffigineqartuarnissaa, aningaasatigut kommunit annaasaqartannginnissaat qulakkeerniarlugu.
- Meeqqanut kinguaassiutitigut atonerluisarnermi suliniutit – siulersuisunit kaammattuutigineqartut taperserpavut tamatumalu kommunini pimoorullugu suliniutigineqarnissaa pingaartillugu inassutigissavarput.
- Innarluutilinnut tunngatillugu – siusinnaartumik pensionisiallit inatsisitigut nalimmassaavigineqartarnissaat kaammattuutigerusupparput, assersuutigalugu innarluutilik suliniaruni tiimimut akissarsiai ukiorpasuarini nalimmassarneqarneq ajormata. Innarluutillit ilinniagaqarnissaat inatsisitigut periarfissinneqartariaqarput, tassami innarluuteqarnertik pequtugalugu inatsisitigut massakkut periarfissaqanngimmata.
- Nukissiuuteqarneq pillugu – siulersuisut saqqummiussaanni amigaataasutut isigaarput nukissiuuteqarneq eqqarsaatigalugu seqernup aammalu anorip erngullu nukingi atorlugit nukissiuutit KANUKOKA-mit eqqumaffigineqassasut, nunarsuarmi mingutsitsinerup annikillisarnissaanut peqataanissaq pingaaruteqarluinnarmat.
- Ilinniartitaaneq – Piareersarfiit illoqarfinni arlalinni ingerlallualereersut taperserpavut kaammattuutigissavarpullu illoqarfinnut allanut siammarneqarnissaat.
- Teknikeqarnermut avatangiiseqarnermullu tunngatillugu – eqqagassalerinermut tunngatillugu tigujuartuarnissaanut aningaasartassaasa malinnaatinneqarnissaat pingaaruteqarluinnarpoq.

Evelyn Frederiksen, Qeqqata Kommunia:

Siulersuisut nalunaarutaannut tunngatillugu siullermik oqaatigerusupparput, kattussuunerup kingorna borgmesterit tusagassiuutitigut ataatsimoortumik nalunaaruteqartarnerini kattuffimmiit annertunerusumik siulittaasumiit arlaatigut tapersiummik nalunaaruteqartoqartarnissaa kaammattuutigalutigu.

Kattussuutsitsinermi killiffik eqqarsaatigalugu maannakkumut isumaqarpugut kommunit annerusumik innuttaasut atugarisaannik kivitsisuusut, taamaattumik Inatsisartut Naalakkersuisullu kivitseqataanerunissaat siulersuisunit naalakkersuisunut oqariartuutigineqassasooq kaammattuutigaarput.

Suliassanik tigooraanissanut tunngatillugu tunngaviumik siunniunneqartut isumaqatigaavut, tassani aningaasartaasa tamakkiisut malinnaatinneqarnissaat aamma pingaartut oqaatigerusupparput. Suliassaqarfinnut tigusinissanut tunngatillugu tigusassat inuutissarsiornermut tunngasut tullinnguuttariaqarput.

Akilerartarnermut tunngatillugu qitiumik ingerlanneqalernerini kommunit akilerarutitigut pisassaasa kingusippallaartumik tiguneqartarnerisa ajornartorsiutaajuarnerat aaqqiivigineqartariaqarpoq. Kiisalu aamma innuttaasut saaffiginninnerini periarfissat pitsanngorsartariaqarput, akilerartarnermi allaffeqarfinni internetimut atugassaqartinnerisigut.

Nunaqarfinni ikuaaveqarnerit eqqarsaatigalugit kaammattuutigerusunnarpoq ullumikkornit pitsanngorsaataasussanik annertunerusumik qanoq iliuseqarnissaq. Ilaatigut periarfissaasinnaavoq eqqakkat ikuallatassat illoqarfinnut assartortalernissaat, kiisalu saviminikut allallu atortukut assartuineq aqputigalugu ingerlaartinneqalersinnaanerat. Taamatuttaaq eqqaaveqarnermi puussiat plastikkit atorineqarnerisa allangortinneqarsinnaanerat eqqarsaatersuutigilersariaqarparput.

Piffissami aggersumi avaqqussinnaajunnaartussaassavarput eqqagassanut akitsuutinik (miljøafgift) pilersitsisinnaaneq. Tassami eqqagassanik pilersitsisut akileeqaataasariaqarnerat siunissami avaqqussinnaajunnaariartussavarput, assersuutigalugu nioqqutissaq pisiarigaanni qaavatigut akiliisinnaaneq eqqunneqarsinnaavoq, taamaalilluni eqqagassat suliarineqarnissaannut akileeqaataassuteqartillugit.

Meeqqat pillugit isumasioqatigiissimaneq eqqarsaatigalugu kaammattuutigissavarput suliniut malersorneqartuassasoq, tassungalu atatillugu qaammatit pingasukkaarlugilluunniit killiffimmik nalilersuisoqartassasoq. Meeqqat kaatsinneqarneragaanerat kisimi ajornartorsiutaanngilaq, illua tungaani meeqqat pualavallaartut ikiorneqarnissaat ujar-torneqartariaqarpoq sulissutigineqarlunilu. Meeqqat atuarfinni nerisinneqartarnissaannut Namminersornerullutik Oqartussanit aningaasaliissutit ikippallarnerannik KANUKOKA-p uparuaanera isumaqatigaarput.

Innarluutilinnut suliniutit pitsanngorsartuarnissaat siunertaralugu kommunit, Namminersornerullutik Oqartussat suliffeqarfiillu peqatigiilluta sanaartortitsinikkut allatigullu pitsanngorsaajuarnissaq suleqatigiissutigisariaqarparput.

Napparsimasut Danmarkimi suliaritittariaqalernerini ilaqutaasut angalaqataasarnerini akikinnerpaamik najugaqartitsisinnaaneq ujar-tortuartaariaqarpoq, pensionat-imik allatulluunniit pilersitsinikkut.

Taamatut Qeqqata Kommunianiit siulersuisut nalunaarutaat oqaaseqaateqarfigalugu tusaatissat tiguarput, neriuutigalugu kaammattuutigerusullugulu kommuninut pitsaanerususaaq anguniarlugu sulissuteqartuarnissaannik.

Apollo Mathiassen, Qaasuitsup Kommunia:

Aningaasarsiorneq: Aningaasatingut inissisimaneq kommunit ilaanni tigoriaannaate-qarnikkut najummassimanartorsiortoqarsinnaasarpoq, ilaatigut Qaasuitsup Kommuni-ani.

Taamaammat KANUKOKA-mit erseqqissumik maannakkut kommunit qanoq inissisi-manerat pillugu qanimut malinnaavigineqartariaqarpoq kiisalu pisariaqarfiatigut Namminersornerullutik Oqartussanut kommuninut illersuisumik saqqumilaarnerusariaqar-poq, kiisalu siulittaasoq ersarinnerusariaqartoq Qaasuitsup Kommuniani isumaqarpu-gut.

Akileraartarnerup/akiliisitsiniartarup qitiusumut nuunneqarnera annertuumik kommuni-nut ajornartorsiummik nassataqarmat sukangasumik piumasarineqarpoq tamanna aaq-qinneqassasoq. Ullorlu manna tikillugu tamanna piviusunngortinneqanngilaq akileraar-tarnermut pisortaqarfimmit. Tamannalu akuerineqarsinnaajunnaarpoq. Ullormiit ullor-mut aningaasaatit takuneqarsinnaaleqqittariaqarput, tamannalu piumasaraarput KANU-KOKA-p sinnerluta oqariartuutigissaga 1/12-modeli aamma pilersaarutaasutut iluatsit-siginngitsoq. Namminersornerullutik Oqartussaanit aningaasat kommunit ingerlaq-qittussat sukkanerusumik piaarnerusumik apuuttalernissaat sakkortuumik piumasaraar-put.

Akileraartarnermut tunngasut kiisalu akiliisitsiniartarfimmut tunngasut kommunit sun-niutaat malinnaavigeqqissaarneqartariaqarluinnartut ukioq kingullerli aallartitaniit piu-masarineqarsimavoq.

Kommunit suliassaqarfinnik tigusinissaat: Ukiup tulliani akisussaaffinnik kommunit tigusinissaannut tunngasut eqqarsaatigalugit ukiup qiteqqunnerani pisinnaasutut isigi-neqarput.

Qinersineq peqqutaalluni ukiumi nutaami tigusassat kinguaattoortussat aamma periar-fissaqartariaqarput ukiup qeqqani tigusinissaannut, inatsisit naammassineqarpata.

Namminersornerullutik Oqartussat Frederiksberg Center-illu akornanni isumaqatigiis-sutit qaqugumut killeqarnersut paasisimasariaqarparput. Nalunngisatsit anpartssel-skab-init ingerlanneqarnerat tiggummineqarmat tamanna aamma iluarsineqarniartaria-qarpoq kommuninit tigguneqartinnagit.

Namminersornerullutik Oqartussaniit imerajuttunik katsorsaannermut tunngasut kom-munit tigguneqartussat eqqarsaatigalugit Frederiksberg Center-imit ingerlanneqartut qanoq sunniuteqartumik tunniunneqarniarnersut 1990-kut naajartorneranni 2000-imul-luunniit ikaarsaarnermi Namminersornerullutik Oqartussanit tigguneqartussatut aalaja-ngiunneqarsimammat, taamaalillunilu qanoq sunniuteqartoqarsinnaanera paaserusunne-qarpoq, suli Namminersornerullutik Oqartussanit tigguneqarsimannngimmata.

Katsorsaannermit tigusinissami pisariaqarluinnartuuvoq pingaartuullunilu aningaasar-taasa malinnaatinneqarnissaat.

Katsorsaannermut tunngasut pillugit kommuninit tigusisussat namminneerlutik siunis-sami ilusilersuisinnaasariaqarput katsorsaanerit eqqarsaatigalugit. Kiisalu piumasaraar-

put kommunit aatsaat tigusissasut suut isumaqatigiissutigineqarsimasut misissorluareer-simalerpata.

Maannakkut tigusinissamut malittaasinnaasut piaartumik naammassillugit qulaajaqquavut piffissaq atugassaq sivikillimmat.

Kiisalu aamma pitsaaliunermut tunngasut maannakkut ingerlaneqartartut suli KANUKOKA-mit eqqummaariffigineqartariaqarput. Familiehøjskolet ingerlanneqartartut anertusartariaqarput, assigisaallu kommuneqarfiit pitsaaliuinikkut soqutigisaat inissaqartinneqartariaqarput.

Piumasarisat kissaatigisallu: 1/12-modelip suli kommuninut atuutsinneqalersimannginneranut tunngatillugu matumani piumasarineqarpoq piaarnerpaamik Namminersornerlutik Oqartussanit eqqortinneqartariaqalersoq.

Siulittaasoq piumaffigaarput ersarinnerusumik inuiaqatigiinni kommunit illersorlugit saqqumilaqqullugu.

Eqimattanit oqaaseqartoqareernerani oqallinnermit:

Bendt B. Kristiansen: Ilaqtariit meerartallit ikiorserneqartarnerat pillugu isumasioqatigiinnermi sulissutigeqquneqartunik isummiussanillu malittarinneqqinnissaq tapersersornarpoq. Inatsisitigut eqaallisaanissaq piumasarineqarpoq aammalu nukiit annertuallaat ikiuunermut atorneqarsinnaagaluartut allaffissornermut atorneqartarnerat uparuarneqarluni. Namminersorerullutik Oqartussani pisortaqarfiit attuumassuteqartut sukannererusumik malinnaaffigineqarnissaat pisariaqarpoq, akisussaaffilli kommuniniimmat najukkani politikerit kaammattorpavut isumaginninnermut pillugu oqallitsitseqqullugit.

Søren Alaufesen: Akileraartarnermik akiliisitsiniartarnermillu ingerlatsinerup qitiusumut nuunneqarneratigut ingerlatsinerup ajorseriaateqarnissaanik kommunit naliliinerat eqquuppoq – tamanna ilaatigut aningaasanik tigorianaannarnik amikkittoqqajaasarnikkut sunniussimammat. Tamakkorpiat KANUKOKA-p siulersuisuisa juunimi ataatsimiinnerminni eqqartorniarpaat akileraartarnermut aqutsisoqarfik peqatigalugu.

Ane Egede Mathæussen: Suliassaqarfiit inuussutissarsiornermut tunngasut aningaa-sarsiorfiusullu kommuninit tiguineqarnissaat pingaartittariaqarparput – tamanna pisariaqarpoq kommunit ”isumaginnittoqarfiinnanngussanngippata”, soorlumi taama oqartartugut.

Siulittaasoq: Nunaqarfinni eqqagalerinermut tunngatillugu taasariaqarpoq ikuallaaveqarfiusunut assartuinissaq Aasianni ikuallaavimmut atatillugu misilerarneqarniarmat, taamaalilluni tassani ikuallaavik tamakkiisumik iluaqutigineqarsinnaaniassammat kiasarnermullu atorneqarluni. Misileraanerup sinerissamut siaruarnissaa siunertarineqarpoq.

Siulittaasup ”kommunit illersorlugit saqqumilaarnerunissaanik” kajumissaarummut tunngatillugu oqaatigisariaqarpoq kommunit soqutigisaannik illersuinissaq siuarsaanissarlu

aalluttuaratsigu. Borgmesterinit oqaaseqaataasartut ilaatigut tigunngitsoortarpavut, ki-sianni assigiinngitsutigut tapersersuiurpugut.

Suliassaqarfinnik kommunit tigusinissaannut suliniutit killiffiinik kommunit ilisimatineqartuassapput tusarniarneqartassallutillu.

Ataatsimiinnermik aqutsisoq aperivoq siulersuisut nalunaarutaat akuerineqarsinnaanersoq. 15-it akuersipput. Ataaseq najuutinngilaq.

Imm. 5: Oqaluuserisassatut siunnersuutit

5a) Kimik IT-ip taarsiissutaasa sumut atorneqarnissaat (Siulersuisut)

(“Aallartitat quppersagaanni” qupp. 30)

Siulittaasoq: Siulersuisut matumuuna inassutigerusuppaat aningaasat 15 mio. kr.-it Kimik IT A/S-imit taarsiissutitut eqqartuussisut aalajangiinerisigut pissarsiarineqarsimasut aningaasanik ingerlatsinermi systemimik nutaamik kommunini atorneqartusamik ineriartortitsinermut atorneqassasut.

Siunnersuummut matumunnga tungavilersuutit tunuliaqutaasullu erseqqinnerusumik allaaserineqarput aallartitat ataatsimiinnerata pappialartaani agguaanneqarsimasuni qupp. 30-miit 32-mut, taakkulu innersuussutigissavakka.

Aammattaq innersuussutigissavakka siulersuisut allakkatigut nalunaarutaanni immikkoortumi ”IT-systeminik ineriartortitsinermik” qulequtaqartumi isummat tungaviusut oqaatigineqartut. Tassani erseqqissarneqarpoq kommunit 18-iusimasut sisamangorlutik kattunnerat aaqqissuussaanermillu iluarsaaqqinneq tassaniittoq innuttaasut kiffartuunneqarnerata pitsanngorsarneqarnissaanik pisariillisarneqarnissaanillu pingaarnerusutigut siunertaqarmat.

Taamaattumik tulluurtuussaaq aningaasat KANUKOKA-p Kimik IT-mut eqqartuussisulersuussinermigut taartisiarisimasai siunertap tamatuma anguniarneranut atorneqassappata kommunit aamma Namminersornerullutik Oqartussat ataatsimut økonomisyste-meqalernissaannut kommunit aningaasaleeqataassutissaattut.

Isak Hammond, Qaasuitsup Kommunია: KANUKOKA-mi siulersuisut inassuteqaataat annertuumik oqallisigereerlugu aalajangerpugut:

IT-ip silarsuaani annertuumik inuiaqatigiinni siuarsarnissarput pillugu 15 mio. atorneqartariaqarput ineriartoqqittoqartariaqarnera neriuutigalugu - nunarput tamaat sullinneqarnissaa anguniarlugu.

Piumasaraarput IT pillugu siunissarlu pillugu Namminersornerullutik Oqartussat kiisalu maannakkut kommunit sisamaasut isumasioqatigiissasut.

Taamaalilluta siulersuisut siunnersuutaat akueraarput. Kommuneqarfippulli angeqimat illoqarfiit arfineq-pingasut nunaqarfiillu 32-t piumasaraarput tamaasa qulakkiikkamik iluarsivigineqassasut nunap sinnerani kiffartuussinerup assinganik.

Katrine Lennert Larsen, Qeqqata Kommunია: KIMIK IT-p taarsiissutaasa sumut atorneqarnissaannut siulersuisut siunnersuutaat aningaasanik ingerlatsinermi systemip nutaap kommuninut tunngasortaanut aningaasaliissutitut atorneqarnissaat tamakkiisumik isumaqatigaarput. Ilanngullugu 15 mill. kr.-it erniaasa kommuninut iluaqutissatut atorneqarnissaat kissaatigaarput.

Martha Abelsen, Kommuneqarfik Sermersooq: Siullermik ajuusaarnarpoq sammisamik oqalugiaat 1, IT-mik aqutsisoqatigiit killiffimmik nassuiaataat, pisussatut nalunaarutigineqareersoq qaangiinnarneqarmat, tassami Kommuneqarfik Sermersuumiit nalilerparput aatsaat taama pingaaruteqartigisoq kommunit tamarmik killiffimmik nassuianneqarnissaat.

Siulersuisut innersuussutaat akuersaarneqarpoq makkuninnga oqaasertalerlugu: Kommunit sisamaasut IT-mik inerisaanissamut assigiissaarinnissamullu tunngavissanik siulersuisut suliakkerneqassapput siunertaqanngimmat 15 mio. kr. sisamanngorlugit aviinnarnissaat. Siulersuisut suliakkererini aamma Sermit A/S kommunit piginneqataaffigisaat qanoq suliakkersorneqarsinnaanersoq isummerfigeqqunaqaaq, ilisimasat ineriartortitsinerillu nunap iluaniiginnarnissaat eqqarsaatigalugu.

Kista P. Isaksen, Kommune Kujalleq: Siulersuisut aningaasanik atuinissamut siunnersuutaat isumaqatigaarput, taamaattorli Kommune Kujalliup ilassutigissavaa aningaasat KIMIK IT-meersut IT aqutigalugu attaveqatigiinnermut pitsanngorsaattitut atorneqassasut, matumani atuarfeqarfiit, nunaqarfiit inoqarfiillu peqataatillugit.

Siulittaasoq: Aningaasat pineqartut kommunini IT-systemimik ineriartortitsinermut atorneqarnissaannik siulersuisut siunnersuutaat tapersorneqarpoq. Sermit A/S-ip qanoq suliakkerneqarsinnaanera eqqaaneqarmat taasaqariaqarpoq Sermit aamma Kimik IT suleqatigiinnissamik isumaqatigiissuteqarsimasut tusaamagatsigu, tamannalu qanorpiaq imaqarnersoq paasiniassavarput.

Ataatsimiinnermik aqutsisoq: Siunnersuut akuersaarneqarpoq.

5b) Nunaqarfimmiut peqatigiiffiannut KANUNUPE-mut attaveqarneq (Siulersuisut)

(”Aallartitat quppersagaanni” qupp. 32)

Siulittaasoq: KANUKOKA-p siulersuisuisa januaarimi 2009 ataatsimiinnissaat sioq-qullugu Kalaallit Nunaanni Nunaqarfimmiut Peqatigiiffiata KANUNUPE-p siulittaasua Jens Kristian Therkelsen saaffiginnissuteqarpoq KANUKOKA-p siulersuisuinut aallartitaqalernissartik kissaatigalugu, immaqqa borgmesterit siulersuisunut peqataalerneranni aaqqissuussinertut ittumik – tassa ataatsimeeqataasartutut, oqalliseqataasinnaallutik taa-seqataasinnaanatilli.

Nunaqarfimmiut peqatigiiffiata taama kissaateqarnerminut tunngavilersuutigaa ukiut aaqqissuussaanikkut allannguiffiusut maanna atuleratsigit nunaqarfiillu arlariinngorlutik aqutsisoqalersussaammata, qularnanngitsumillu arlaatigut ajornartorsiutinik aporfeqartartussaagamik, ersarinnerusumik oqariartuuteqartarnissamut periarfissaqarusunnertik.

KANUKOKA-p siulersuisuisa qinnutigineqartutut aaqqissuussinissaq tulluurtuutinngilaat, tassa nunaqarfiit kommuninut KANUKOKA-mik kattuffeqartunut ilaareermata. Taamaattorli siulersuisut isumaqatigiillutik tamanna Aallartitat ataatsimiinnerannut oqaluuserisassanngortikkusuppaat, taamaalilluni erseqqissaataasumik tunngaviusutigullu oqaluuserineqarsinnaaniassammat.

Nunaqarfimmiut peqatigiiffiata aamma Kalaallit Nunaanni Kommunit Kattuffiata qaninnerusumik imminnut attaveqarnissaat siulittaasutigoortumik 2002-mi oqaloqatigiisutigineqarsimavoq. Tamatuma kingunerisaanik siunniunneqarpoq KANUKOKA-p peqatigiiffiup paasissutissaataanik siammarterinikkut KANUNUPE ikiussagaa, tamanna pissalluni nittartakkap kanukoka.gl-ip nunaqarfinnut tunngasunik immikkoortortaliorfigineratigut. Tamanna isumassarsiatsialaavoq, tassami qanimut oqartussaaqataanermi sammisassanik nunaqarfimmiut peqatigiiffiata sammisaanik siammartereqataanissaq KANUKOKA-p kissaatigisarimmagu.

Tamannali piviusunngunngitsoorpoq, tassa apeqqutaalermat peqatigiiffimmit paasissutissanik pilersorneqarnissaq. Peqatigiiffik taamanikkut allattoqarnerup tungaatigut akissaqarsimagunannigilaq, taamaattumillu paasissutissat pisariaqartinneqartut pineqanngitsoorlutik.

KANUKOKA-p siulersuisuisa 2009-mi Aallartitat ataatsimiinneranni peqataasut tamatumunnga qanoq isumaqarnerusut tusarusuppaat.

Martha Abelsen, Kommuneqarfik Sermersooq: Nunaqarfimmiut peqatigiiffiata KANUNUPE-p saaffiginnissutaa akuerisinnaanngilarput makku tunngavigalugit: Nunaqarfinnut tunngasut kommunalbestyrelse aqutugalugu ilusilersugassat nutaamik periarfissaqaleqqammerput, tassami qinersineq kingulleq annertuumik allanguiffiusoq aataat timitalersulerparput.

KANUNUPE-p immikkuullarissuunera iluatigalugu nutaamik aaqqissuussinermut tullu-arsaanikkut eqeersaqinneqarnissaa kaammattuutigaarput. Upperaarpullu ineriartortitsi-

neq nutartigaq tamanut pitsanngorsaaqataassasoq.

Peqatigiiffiup siulittaasuata ataatsimeersuarnermi alaatsinaattutut peqataasarnissaa kaammattuutigaarput.

Katrine Larsen Lennert, Qeqqata Kommunia: Nunaqarfimmiut Peqatigiiffiata KANUNUPE-p KANUKOKA-p siulersuisuinut ilaasortaataitaqalersinnaanerminnut tunngatillugu saaffiginnissutaanut tunngatillugu nunaqarfiit ingerlanneqarnerat kommunit ataanni akisussaaffigineqarmat tulluurtuosorineqanngilaq immikkut siulersuisunut ilaasortaataiqarsinnaanerat, tassami eqqaamasariaqarmat KANUKOKA tassaamat kommunit peqatigiiffiat.

Illua tungaani siulersuisunut kaammattuutigissavarput siunissami nunaqarfimmiut peqatigiiffiata kattuffimmiit arlaatigut suleqatiginerunissaat, aammalu kattuffiup ataatsimeersuarnerani alaatsinaattutut peqataataitaqarnissaata qulakkeersimaneqarnissaa. Taamatullu siulersuisunut kaammattuutigissavarput nunaqarfinnut tunngatillugu tusarniagassaqtillugu nunaqarfiit peqatigiiffiat ilanngullugu tusarniaaffigineqartarnissaa.

Isak Hammond, Qaasuitsup Kommunia: Oqallisereerluta sukumiisumillu sammeererlugu gruppimi amerlanerussuteqartut isummerput alaatsinaattutut peqataasinnaasutut periarfissinneqassasut 2013 aallarnerfigalugu.

Thomas Ezekiasen, Kommune Kujalleq: Kommune Kujalliup KANUNUPE-p KANUKOKA-p siulersuisuinut aallartitaqalernissamik kissaateqanera tulluurtuutinnigilaq, ilaatigut nunaqarfiit kommuninut KANUKOKA-mik kattuffeqartunut ilaareermata. Taamaattorli Kommune Kujalliup isumaqatigaa paasissutissat KANUNUPE-meersut siammarternissaannut KANUKOKA-p ikiuunnissaa.

Ataatsimiinnermik aqutsisoq: Nunaqarfimmiut Peqatigiiffiata KANUKOKA-p KANUKOKA-p siulersuisuini alaatsinaattutut ataatsimeeqataasinnaatitaalernissaa akuersaarneqanngilaq, kisianni KANUKOKA-mut aallartitat ataatsimiinneranni alaatsinaattutut peqataasinnaatitaalernissaa akuersaarneqarpoq peqatigiiffiullu paasissutissanik siammarterinerani KANUKOKA-p ikiuunnissaa kissaatigineqarluni.

5c) Kommunit tunitsivinnik piginnittunngorsinnaanerat (Kommuneqarfik Sermersooq, Atassut)

(“Aallartitat quppersagaanni” qupp. 33)

Katrine Larsen Lennert, Qeqqata Kommunia: Kommunit tunitsivinnik piginnittunngorsinnaaneranun tunngatillugu siunnersuut tunngaviatigut isumaqatigaarput sukumiinerusumillu misissuilluartaqarnissaa kaammattuutigalugu.

Isak Hammond, Qaasuitsup Kommunia: Kommuneqarfiusimasuni misilittakkat aallaavigalugit kommunit piginnittuutinnagit namminersortunut piginnittuulersitsinissaq aallarnisaanermilu kommunit siunnersuinikkut peqataasassasut inassutigaarput. Siunnersueriaaseq atorneqartoq kommuninit periarfissaatitaasoq sulii eqaallisaqqillugu atorneqarnissaa innersuussutigaarput. Pitsaasunik kingunilimmik Ilulissani aamma Uummannaq eqqaani nunaqarfinni siunnersuisoqarsimavoq, tamannalu takussutissaavoq siunnersuineq kommunit fabrikkinik piginnittunngunngikkaluartut ingerlatsisoqarsinnaanerani.

Thomas Ezekiassen, Kommune Kujalleq: Siunnersuutip qulequtsernera ippinnartikkaluarlugu, taamaattoq siunnersuutip imarisaa tamakkiisumik taperserparput, imatullu aamma oqaaseqarusulluta:

Namminersornerullutik Oqartussat piginneqatigiiffinnik pilersitsisinnaammata, soorlu RG, GG, Neqi il.il. taava aamma kommunit piginneqatigiiffiliariniakkanut aallarniutissanut aningaasaliissuteqarsinnaanerani annertunerulertariaqarpoq kommuninik nakkutiliisoqarfik apereqqaanngikkaluarlugu.

Martha Abelsen, Kommuneqarfik Sermersooq: Emilie Olsen siunnersuummik qaqqitsimmat qutsavigaarput, ilami ajornartorsiut qaqqinneqartoq nutaajunngilaq kiisalu aaqqiissuteqarnissaaq pisariaqalivissimammata. Inuussutissarsiorerup ineriartortinneqartuarnissaa pingaaruteqarmat siunnersuut tunngaviatigut taperserlugu suleqataaffigineqartariaqartut akuersaarparput.

Maannamut misilittakkat tunngavigalugit siunissami ineriartortitsineq isumalluarfigalugu isumaqarpugut kommunit aallarnisaanermi peqataasinnaanerani misissorneqartariaqartoq. Inuit imminnut napatittut pisariaqartippavut - taamaattumik tunngavileeqataannissarput pingartipparput. Taamatumani Inatsisip nr. 23, 18. decembari 2003-meersup killiliinera aaqqittariaqarpoq, tamannalu Inatsisartunngortussanut suliaakkiissutiginiissaa siulersuisuni nalilersorlugu suliareqqitassangortipparput. Pingartipparput tunisassiorfiit eqqartuiffigineranni ippassaaq ullaap tungaani saqqummiunneqartut eqqarsaatigalugit tunitsiviup suunera ersarissarneqartassasooq, tassalu tigooraaneq, tunisassiorneq, pooruineq, assartuineq kiisalu tuniniaaneq eqqumaffigalugit.

Demokraatit tunngaviatigut sutigulluunniit pisortat piginneqataanissaaq isumaqatiginngilaat. Sinaakkusersuinissaq - allaffissornikkut siunnersuiuarnissaaq taperserparput.

Inuussutissarsiorerup ineriartortinnera ilutsinik assigiinngitsunik sammiveqartoq qulakkeerneqassaaq. Naggataatigut ataavartumik siunnersortit qulakkeerlugit tulluarsasapput periarfissat tamaasa isigalugit.

Siulittaasoq: Apeqqut pineqartoq ilaatigut KANUKOKA-mut aallartitat ataatsimiittarnerini oqaluuserineqartuuartarsimavoq. Kisianni maanna siulersuisunut suliaakkiutaasoq pimoortissavarput, tassa Inatsisartut nutaat saaffigineqassasut inuussutissarsiutinik aallarnisaanermi ineriartortitsinermilu kommunit sunniuteqarluartumik sinaakkusersuisinnaaqqullugit inatsisitigut eqaallisaasoqarlunilu naleqqussaasoqarnissaanik suliniuteqaq-

qullugit.

Apollo Mathiassen: Inuussutissarsiutinik aallarnisaanermi ineriartortitsinermilu siunnersuerialaatsinik eqaallisaanissaq pisariaqarpoq.

Jens B. Frederiksen: Siunnersuutip qulequtaa marloqiusamik paasisariaqarami oqalligissallugu erloqinalaarpoq. Pisortat piginneqataanissaat anguniagaassanngilaq, kisianni sinaakkusersuinerup pitsannorsarnissaa siunertaassaaq.

Kîsta P. Isaksen: Inuussutissarsiutinik pilersitsiniartut aporfissarpassuaqalertarput. Tamanna inatsisiliornermi ingerlatsinermilu iluarsisariaqarpoq, kisianni kommunit piginneqataalerneratiguunngitsoq.

Ataatsimiinnermik aqutsisoq: Suliassaq siulittaasup oqarneratut siulersuisut tigussavaat.

5d) Pisortanit ikiorsiissutinik assigiissaarinissaq (Kommuneqarfik Sermersooq, Atassut)

(”Aallartitat quppersagaanni” qupp. 35)

Kîsta P. Isaksen, Kommune Kujalleq: Siunnersuut tunngaviatigut isumaqatigaarput. Taamaattumillu aamma ”Ilaqutariit meerartallit ikiorserneqartarnerat” pillugu isumasioqatigiinnermit februaarimi pisumit eqikkaaneq innersuussutigeqqissavarput, tassani tunngavissat atuarneqarsinnaammata.

Kiisalu KANUKOKA kissaateqarfigissavarput isumaginninnermut tunngatillugu pineqartumut nutaamik inatsisiliortoqaraangat erseqqinnerusunik ilitersuusiortarnissaq Namminersornerullutik Oqartussanut qinnutigeqqullugu.

Thiiooq Knudsen, Kommuneqarfik Sermersooq: Pisortanit ikiorsiissutinik assigiissaarinissaq taperserparput. Qujassutigaarput qulaajaaneq ersarissoq saqqummiumneqarmat. Sapinngisamik maannamut qaffaatigineqartut akit qaffakkiartornerannut nalimmassaajuartuarnissaat qulakkeerneqassaaq. Isumasioqatigiittunit siunnersuutigineqartutut Inatsisartut inatsisaat nalilersoqqinneqartariaqarpoq arlalitsigut ullutsinnut tuluarsarnerusariaqarmat. Pingaartipparput kommunit oqartussaaffii innarlernagit atuutinneqassasut.

Isumasioqatigiit inassuteqaataat aallartitat tapersigaat siulersuisut ingerlateqqissagaat innersuussutigaarput.

Katrine Larsen Lennert, Qeqqata Kommunia: Pisortanit ikiorsiissutinik assigiissaarinissamut siunnersuut eqqarsaatigalugu, siunnersuutigerusupparput inatsisiliornikkut akit allanngorarnerat malillugu qaffanneqartarnissaat anguniarneqassasoq.

Ikiorsiisarnermut kommunit maannakkut assigiinngitsunik ikiorsiisarnikkut periuseqarput, taamaattumik kaammattuutigissavarput ukiuni aggersuni sulissutigineqassasoq ikiorseeriaatsit assigiissarneqarnissaat tamanilu nalilersueriaatsit assigiinnerusumik toqqammavigineqarnissaat.

Karl Markussen, Qaasuitsup Kommunia: Kommunit akornanni inunnut tapit assigiissarneqarnissaat sularineqassasoq piumasaraarput. Massakkut inatsisip atuuttup allanngorani atuutiinnarneqarnissaa inassutigaarput.

Ane Egede Mathæussen: Ilaqutariit meerartallit ikiorserneqartarnerat pillugu ukioq isumasioqatigiinnermi uparuarneqartoq tassaavoq isumaginninnermi ikiorsiisarneq pillugu peqqussut 2006-imeersoq. Aalisarnermik piniarnermillu inuussutissarsiuteqartutut allagartallit inatsisit naapertorlugit ikiorserneqarsinnaasannginnerat aamma taamani eqqartorneqarpoq. Maannalu KNAPK, ICC aamma KANUKOKA suleqatigiillutik tamanna pillugu siunnersuusiussamaalerput.

Apollo Mathiassen: Kommunit kattunneranni Qaasuitsup Kommuniani ikiorsiissutinik assigiissaaarisimanngilagut, taamaaliornissarli aalajangiupparput – tamannalu pisinnaavoq inatsisit atuuttut allanngorteqqaanngikkaluarlugit.

Bendt Broberg Kristiansen: Ikiorsiisarnermut peqqussutip iluarsineqartariaqarnera pillugu KANUKOKA-p siulersuisui naalakkersuisunut saaffiginnereerput.

Ataatsimiinnermik aqutsisoq: Oqaaserineqartut tunngavigalugit suliassap ingerlateqqinnissaa siulersuisut isumagissavaat.

5e) Siulersuisut katitigaanerata (Kommune Kujalleq)

(”Aallartitat quppersagaanni” qupp. 36)

Karl Markussen, Qaasuitsup Kommunia: Qaasuitsup Kommunianiit siulersuisut katitigaanerata maannamut atuuttup atuutiinnarnissaa inassutigaarput. D’Hondt-ip agguariaasia malillugu ingerlaqqinnissaaq inassutigaarput. Borgmesterit taasisinnaalernissaat akuersaanngilarput.

Katrine Larsen Lennert, Qeqqata Kommunia: Siulersuisut katitigaanerannut siunnersuummut oqaatigissavarput ukioq kingullerli isumarput allanngorsimanngimmat, tassalu borgmesterit siulersuisuni ilaasortaalertariaqartut taaseqataasinnaallutik. Suli isumaqarpugut kattuffik nakuunerulissasoq aammalu ataatsimoornermut nukittorsaa-taassasoq borgmesterit taaseqataasinnaallutik siulersuisuni ilaasortaappata.

Jens B. Frederiksen, Kommuneqarfik Sermersooq: Siunnersuut akuersaanngilarput. Kommuneqarfik Sermersuup gruppiani isumaqarpugut maanna piffissanngunngitsoq malittarisassat allanngortinnissaannut inissitsiternermi siulersuisut aaqqissorsimanerat pillugu.

Eqqarsaatigissavarput aatsaat qanittukkut kommunerujussuit sisamat pilersinneqarsimammata.

Akerlianik kissaatigaarput malittarisassami § 15-ip nutarterneqarnissaa. Maanna malittarisassat allanngortinneqassappata qaquguluunniit aallartitat ataatsimiikkaangata tamanna aalajangerfigineqarsinnaavoq.

Pissusissamisuussaagaluarpoq malittarisassani § 4-ip allanngortinnissaa. Qullersaasariaqaralarpoq ataatsimeersuarneq. Taamaalilluni malittarisassat ataatsimeersuarmitaamaallaat allanngortinneqarsinnaasariaqarput.

Kîsta P. Isaksen, Kommune Kujalleq: KANUKOKA-p malittarisassaani malittarisassanut allannguutit peqatigiiffiullu atorunnaarsitaanera pillugit aalajangersakkat § 15-imiipput.

§ 15 immikkoortoq 1-imi allassimasoqarpoq imatut: “Malittarisassanik allanngortitsineq taamaallaat pisinnaavoq aallartitat ataatsimiinneranni taaseqataasinnaallutik aallartitatut najuuttut ikinnerpaamik 2/3-liisa isumaqataallutik aalajangiinerisigut.”

Taamaattumik Kommune Kujalliup oqaluuserisassatut siunnersuutigaa kattuffiup siulersuisoqarnerata katitigaaneranut tunngasoq malittarisassaniittoq allannguuteqartinneqassasoq.

Taamatut siunnersuuteqarnermut tunngaviuvoq Kommune Kujalliup kissaatigimmagu siunissaq isigalugu KANUKOKA nukittunerpaaffissaminiissasoq. Allanngortiternermit annertooujussuaq ingerlanneqarmat naleqqussartuarnissaq aamma pisariaqarpoq, aamma KANUKOKA-p siulersorneqarnerani.

Siunnersuutit marluk assigiinngitsuupput, pingaarnertulli isummerfissatut inassutigaarput borgmesterit ilaasortatulli allatut taaseqataasinnaallutik peqataanissaat.

Siunnersuutini taakkuninnga allanngortitsiniangilanga, kisianni qinigaaffik manna naatinngat siulersuisut siunnersuusiorumallutik inassuteqaataat malinneqaqquara.

Apollo Mathiassen: Qaasuitsup Kommunianit isummernerput aalajangiusimavarput, kisiannili soorunami apeqqut kingusinnerusukkat qaqeqqinneqarsinnaavoq.

Katrine Larsen Lennert: Misilittakkat tunngavigalugit aalajangertoqartarli. Taamaattumik siulersuisut inassutaat tapersorsorparput.

Jens B. Frederiksen: Qanoq ilisukkulluunniit kattuffiup siulersugaanera pillugu siunnersuuteqartoqarsinnaavoq, kisianni malittarisassat qinigaaffik una naallugu atuuttariaqarput. Taamaattumik aamma siulersuisut inassutaat akuerinngilarput.

Ataatsimiinnermik aqutsisup apeqqutigaa qassit siulersuisut inassuteqaataat ("siulersuisut pisussaaffilerneqassasut qinigaaffik naatinnagu suliarilluakkamik siunnersuusiusasut aalajangersakkat nutaat atorneqarnerini misilittakkat tunngavigalugit.") akueriومانeraat.

Akuersisut: 7

Ataatsimiinnermik aqutsisup apeqqutigaa qassit taamaalillutik Kommune Kujalliup siunnersuutaa (borgmesterit siulersuisuni taaseqataasinnaallutik ilaasortaalernissaat tamatumalu saniatigut kommunit tamarmik immikkut siulersuisuni sinniisoqalernissaat pillugit kattuffiup malittarisassaanik allanngortitsinissaq) itigartinneraat:

Itigartitsisut: 9

Siulittaasup erseqqissarpaa siulersuisuni maanna borgmesterit taaseqataasinnaangikkaluarlutik ataatsimeeqataaffigisartagaanni taasisaqattaarneq ileqqorineqanngimmat, kisiannili angusaqarnissaq pillugu naligiilluni oqaloqatigiittoqartarmat. Aamma borgmesterit siulersuisuni ataatsimeeqataasarnerannut aningaasartuutit kattuffiup akilertalersinnaavai.

Imm. 6: Kattuffiup 2008-mut naatsorsuutai

(*"Aallartitat quppersagaanni"* qupp. 38)

KANUKOKA-p direktøria **Martha Labansen** saqqummiussivoq.

Thomas Ezekiassen, Kommune Kujalleq: Naatsorsuutit taamatut isikkoqartillugit Kommune Kujalliup akuerivai.

Per Nukaaraq Hansen, Kommuneqarfik Sermersooq: Naatsorsuutit, iluarsisaq eqqaassanngikkaanni, siulersuisut saqqummiussaata akuersaarparvut. Taamaattoq sapinngisamik siulersuisut kaammattorumavavut allaffissornermut sukut sipaarniuteqarsinnaaneq ugartussagaat. 2010-mut pilersaarutinut atatillugu kommunit 18-iusimasut sisamaannanngortinneqarnerata kinguneranik kattuffimmit allaffissornermit sipaaruteqarsinnaaneq anguniarneqartariaqarpoq.

Evelyn Frederiksen, Qeqqata Kommunia: Ukiumoortumik naatsorsuutitut tunngatilugu oqaatigissavarput pissutsit atuuttut naapertorlugit ingerlasimasut. Taamaattorli kommunit kattussuunneranni siunertaamat aningaasartuutikillisaanissaq, kaammattutigissavarput siunissami kattuffiup aningaasartuutikillisaaneq ingerlatissagaa - kiisalu siuliani oqaatigeriikkatsit Kimik IT-mit taarsiissutisiat erniaasa kommunini qarasaasiatigut allatigullu iluaqutigineqarnissaat.

Karl Markussen, Qaasuitsup Kommunia: Kukkunersiuisut oqaaseqaataat toqqamavigalugu kusanartumik atorfilinnit siulersuisunillu suliarineqarsimanerisa akuersaarneqarnissaannut tunngavissaqarpugut. Akuersaarpavullu.

Siulittaasoq: Allaffissornermi sapinngisamik sipaarniarnissaq isumaqatiginarpoq. Masakkuugallartorli – aqqissuussaannermut nutaamut ikaarsaarnermi tamatumalu kingunerisaanik soorlu suliaasaqarfiit kommuninut nuunneqarnissaannut piareersarnermi – tamanna ajornakusoortoq misigereerparput. Immaqa inuttatigunngikkaluartoq sipaarniarpoqarsinnaavoq.

Jens B. Frederiksen: Siunissaq ungasinnerusoq eqqarsaatigalugu sipaarniarnissaq eqqarsaatigineqarpoq. Kisiannili KANUKOKA-p aqqissugaanera eqqarsaatigeqqittariaqarpoq, aningaasarpassuimmi kattuffimmut atorneqartarmata.

Ataatsimiinnermik aqutsisoq taasisitsivoq. 16-it (tamarmik) naatsorsuutitut akuersipput.

Imm. 7: Kattuffiup 2010-mut missingersuusiai, aamma ilaasortat 2010-mi akiliutissaannik aalajangiineq

(”Aallartitat quppersagaanni” qupp. 46)

KANUKOKA-p direktøria **Martha Labansen** saqqummiussivoq.

Apollo Mathiassen, Qaasuitsup Kommunia: Missingersuusiat Qaasuitsup Kommunanit akuersaarpavut taama isikkoqartillugit.

Ilanngullugu oqaatigissavarput suliaasaqarfinnik tigooraaneq pillugu oqalliseqarnerunissatsinnik ujartuigatta, tamannalu KANUKOKA-mit annertunerusumik pimoorunneqaqqarput, soorlu ikaarsaariarnerup tungaanut aviisiliap paasissutissiisup saqqummer-sinneqartarneratut.

Evelyn Frederiksen, Qeqqata Kommunia: Missingersuutit akuerinerannut atatillugu aningaasartuutikillisaanissaq anguniarneqassasoq kissaatigaarput, tassami kommunit kattunneranni aningaasartuutikillisaanissaq siunertaammat.

Per Nukaraq Hansen, Kommuneqarfik Sermersooq: Naatsorsuutitut tunngatillugit oqaasereriikkavut innersuussutigalugit missingersuutit akuerivavut.

Kîsta P. Isaksen, Kommune Kujalleq: Taamatut isikkoqartillugu Kommune Kujalliup akuerivaa – aammali borgmesterit siulersuisuni ataatsimeeqataasarnerannut aningaasartuutissat ilannguteqquneqarput.

Ataatsimiinnermik aqutsisoq: 2010-mut missingersuutit tamanit akuerineqarput.

Imm. 8: Tamalaat

Ataatsimiinnerup aallartinnerani aallartitat najuuttut nalunaarsorneqarneranni ataatsimiinnermik unitsitsigallartariaqarsimaneq ippigalugu taaneqarpoq. Peqataasinnaajunnaarnermi piffissaalluartillugu erseqqissumik nalunaaruteqartarnissaq pisariaqartillugulu piginnaatitsissummik tunniussisarnissaq siulittaasup inassutigaa.

Aallartitat ataatsimiinnerata ammarneqarnerani nunaqarfinni tunisassiorfeqarneq pillugu Royal Greenlandimit paasissutissiineq innersuussutigalugu Apollo Mathiassenip Qaasuitsup Kommunianeersup oqaasii imaapput: - Qaleralinnik tunisassiornermi suliffissuit nunaqarfinniittut eqqaaneqannginnerat ippigaarput. Nunaqarfinni suliffissuit kiliffiat nalorninartuliinnartut oqariartuutigineqarpoq. Allaanngilaq nunaqarfiit suliaat ernumanartuinnartut isikkulerniarneqartoq. Piviusorli isertuussatut toqqorneqartoq una oqaatiginiarparput: Upernaviup, Uummannap Ilulissallu eqqaanni nunaqarfinni tunisassiornikkut ingerlatsiviit aningaasanik nunatsinnut annertuumik isaatitsipput.